



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 10 Yangia anidakangma : Tir Yimiyim tiryimiyim@aolima tir yimiyim TAPAK 7

WTA Finals nung Ashleigh Barty masayatsüWTA Finals nung Ashleigh Barty masayatsü

PM Modi-i India nung Covid vaccine yangluba company 7 ajuru



VOL. XIX NO. 16 (ADOK 16) DIMAPUR AMUNGNÜ (SUNDAY) MONGPUTENI (OCTOBER) 24, 2021 ₹ 5.00

Abu Metha-i Mizoram CM den ajurutep



Abu Metha-i tanü Mizoram Chief Minister Zoramthanga den ajurupetba noksa nung angur.

Mizoram Youth Commission (MYC)-i jaokba atema Abu Metha ya tang Mizoram nung oa lir.

Pa ya Athletic Federation of India indang Associate Vice President lir aser Mizoram CM den Nagaland nung amongtsü aliba South Asian Cross Country Championships indang osang lemsatep.

Mizoram-ia Hornbill Festival, Asia Music Summit aser Indian National Rally Championships indang Grand Finale sentongtem nung shilem agitsü atema Abu Mehta-isa jaok.

Paisa CM Zoramthanga den Northeastern region nung saisapongbare renloksü aser külemi youth collaborative maparen inyaksü onüktem lemsatep.

Abu Mehta-i Aizawl nung aliba Laldenga Memorial nung oa tetushi agitsü. Pai Aizawl tongli Mizoram nung Chief Minister mezüngbuba aser Mizo Movement tanishir nungshilungi ao.

Dimapur, October 23, 2021 (TYO): Nagaland Chief Minister atema Advisor, Abu Metha-i tanü Mizoram Chief Minister Zoramthanga den ajurutep.

NSCN (R) meloksa lir: Media Cell

Dimapur, October 23, 2021 (TYO): NSCN (R) loksago ta osang prokshibaji tiyazü aser onok sasep nung ken o tila ka adokba yimjak nung kanga ulua prokshiba atema sasa bilemer, ta Media Cell, Working Committee, NNPGs sangdong ka nung metetdaksü.

WC NNPGs Convener, N. Kitovi Zhimomi aser tanga NNPGs lenirtemi mapang shitak nung tebang aiba ajanga ken o angatettepogo, ta parnokki ashi.

NSCN (R) nung temaba lenir asem külemi yaritepa

inyaksangshia aotsü aser tatemang telemetba ka magi tashi NNPGs tashi itdaksütsü, ta sangdong nungsa shia lir.

Tebilemba tamajung aliba nisung kari parnok ajangzüksü atema lenirtem ajungmesoba bushitetogo aser parnok dang telesa adoktsü indang mapa meinyaksü metetdaksü, ta Media Cell sangdong nungsa shia lir.

Kasa sangdong nung NSCN-R President Wangtin Naga, Vice-President Akato Chopphi aser Ato Kilonser P. Tikhak nungeri sign süa lir.

Nagaland police 13 mapa nungi anentsü

Dimapur, October 23, 2021 (Agencies): Hokolbarnü Nagaland Police terasem (13) mapa nungi anentsüogo. Parnoki gold bars apuba osang magütsüba atema mapa nungi anentsü.

Taküm September 10 nü Kohima district kübok Khuzama nung aliba inter-state check gate anükertemi gold bar 10 apu, ta Senior Superintendent of Police (Crime) and PRO police headquarters, Manoj Kumar-i ashi.

Parnok ya police narcotic cell nungi lir aser parnokki hon apuba

osang magütsü, ta pai ashi. Iba osang angazükba sülen September 17 nü police headquarters, Kohima nung police 13 anema ken o ka benok, ta PRO Manoj Kumar-isa metetdaksü.

Ano külen, October 3 nü narcotic checkpoint nung gold bar 290 apuba nungi karbo samaogo ta social-media nung prokshiba atema PRO-i osang jangjashitsüogo.

Hon seret 48.14 tashi apu ajak police 'malkhana' (godown) nung yua lir, ta Kumar-i ashi.

Küm 14 sülen 'matchbox' jenjang atutsü

New Delhi, October 23, 2021 (Agencies): Küm 14 sülen matches pongdang (matchbox) indang jenjang atutsü. December 1, 2021 nungi matchbox ka nung Rs 2 akümtsü.

2007 küm matchbox pongdang ka nung poisa 50 agi yoka aliba senpak 1 aküm.

Yakünü Sivakasi nung All India Chamber of Matches senden ka amendang iba telemetba agi.

Oset jenjang atuba ajanga All

India Chamber of Matches-i matchbox pongdang ka nung Rs 1 agi ayokba nungi Rs 2 akümtsü lemetet.

Tang matchbox 600 aliba (pongand shia matchsticks 50) Rs 270 nungi Rs 300 agi ayoker.

Tamil Nadu nung matchbox-making industry ajanga nisung lakh 4 nem mapa agütsür.

Mapa inyakterem rongnung tetsür 90% lir aser matchbox jenjang atuba ajanga industry-i mapa inyaker nem taa tajungba agütsütsü imlar

ANCSU indang 20 buba Biennial General Conference temogo

Kohima, October 23, 2021 (TYO): All Nagaland College Students' Union (ANCSU) indang 20 buba biennial general conference Honibarnü tembanogo.

Mungdang shibangba sentong nung Y Kikheto Sema, IAS-i tetushi tejaoker ka ama shilem agia liasü.

Tanep agiba sentong nung Higher Education & Tribal Affairs Minister Temjen Inma Along-i union waka salatsü aser clock tower lapokja liasü.

"ANCSU lenirtemi tatishitsü keta lenisüba ajanga kaketshir lenisüba jenjang tajungba kümogo. Asenoki pei taküm meyipa repringshitsüla aser meranga inyaksüla" ta Inma Along-i ashi.

"Tanü Nagaland ajanga asung Nagaland yangertsü. Mungdang nung adenerkem ya teimla agütsürtem asütsüla. Asenoki telemsa adoktsüba mapa meinyaksüla. Asenoki tetsübu kecha melii ochi jembitsüla. Kin balala lemsaba ya tuluba-tilaba bendangtsü atema masü saka taküm libalirötsü atema dang lir" ta paisa metetdaksü.

ANCSU President Vimeyiekhö Vitso-ia tir o jembidang 'digital protest' indang ashi.

"KSCJ ali ken o aser Post Matric-Scholarship atema lungkak aita ajanga mapa shitak inyaktar" ta pai ashi.

Iba mapang Vitso-i Kohima Science College Teachers' Association-i Higher Education Minister dangi züluba shidi ka zünga metetdaksü.

"Kaketshirtem ya degree amertem masü saka khuret koktetertem asütsüla. Nagaland

nung tangatetba tasen aliba lanurtem nungdaker" ta NSF President Kegwayhun Tep-ia o jembidang ashi.

Iba sentong nung Kros College, Kohima-i sobaliba shilem ka agi aser Miss Rokono Mekro o SD Jain Girls College, Dimapur kaketshirtemi ken aten.

Tanü anungdang Academic session nung Chief Executive Officer SDMA, Johnny Raungmei-i tetushi tejaoker ka ama shilem agi.

"Testüibaji asenoki ajangshiba, tanü ta asen tebilemtsü aser tarutsüji asen maangka lir" ta Johnny Raungmei-i ashi.

Paisa ANCSU ketdangpur tasentem moatsü aser parnok dang tiyongtsü nung inyakterem aser kaketshirtem atema lenmang bushirtem asütsü ayongzük.

Iba sentong nung Fazl Ali College, Mokokchung-i folk fusion aser Phek Government College o St. John College, Dimapur ken ajanga shilem agi.

20 buba biennial general conference tembangba sentong nung APC aser Commissioner & Secretary Government of Nagaland, Y Kikheto Sema, IAS-i tetushi süa jaoker ka ama shilem agi.

"Iba mungdang atema omen 'Heralding Tomorrow' ya asung atema teimla aser mangdang ka lir" ta pai ashi.

Kaketshirtemi jembitsüla, bilemtsüla aser sentong atongtsüla. Mapang talangka yimtem tebilemtsü atema inyaka aruba mapa ya lanu putu atema tatemang küma lemettsü, ta Y Kikheto-i ashi.

"Nagaland nung shisalioker reju tajungtem nungdaker aser iba ajanga kaketshirtemi tangalen

moi state nung dang higher education azungtsü. Iba ajanga asen rongsenketzung jenjang ajungkettsü" ta paisa ashi.

Paisa lanurtem dang coffee plantation, rubber plantation mapa inyaksü ayongzük.

"Water security aliba ajanga food security takoktsü lir. Asenoki Nagaland tasen ka atema sarasademtsüla aser sentong atongtsüla" ta Y Kikheto-isa metetdaksü.

Iba sentong nung Sazolie College, Kohima-i ken ka aten aser ANCSU Vice President-i anküp tepela o jembidi.

Mungdang nungsa Fazl Ali College, Mokokchung nem "Best Discipline College" sempet agütsü.

Tanü Election Commission ajanga ANCSU ketdangpur tasentem nem tezüngzüktem agidaksü.

2021-2023 kümsük atema ketdangpurtem:

Toito D Chishi (President), Kahovi Z Rochill (Vice President), Tenyesinlo Bukh (General Secretary), Dzüzüve Swüro (Assistant General Secretary), H Kivika Achumi (Finance Secretary), Achiru Pfithu (Games and Sports Secretary), Ao - Acum Jamir (Magazine Secretary), Imtinaro Imsong (Education Secretary), Kivinoka A Sema (Info. & Publicity Secretary), Temsuwapang Jamir (Social and Cultural Secretary), Shikalito N Awomi (Women Affairs Secretary), S Topeka Yephthomi (Speaker), Hobito K Kits (Deputy Speaker), Ikato Zhimo (Assembly Secretary), Ikiyeto H Zhimomi (Auditor General).

COVID-19 Nagaland: 18 dak putet, 10 taneptsü angu & 1 asü

Kohima, October 23, 2021 (TYO): Honibarnü Nagaland nung nisung 18 dak COVID-19 putet aser parnok züngsema nisung ajak agi 31,707 kümogo.

"Tesüiba ghonda 24 tsüngda nisung 18 dak COVID-19 putet. Parnokji Dimapur aser Kohima nung tenetnet (7) aser Phek nung 4 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Kasa mapang nisung 10 tashi taneptsü angu. Parnokji

Mokokchung nung 6, Dimapur nung 3 aser Kohima nung 1 lir" ta paisa ashi.

Tang nisung 250 anepaludar saka parnok rongnung nisung 188 dakbo shirangba yimya kecha mali, ta Dr Kikon-isa ashi.

Honibarnü Dimapur nung COVID-19 puteta alir ka asüba züngsema tasür ajak agi 679 kümogo.

"Hokolbar tashi nung nisung 704,836 nem COVID-19 vaccine indang dose 11,70,957 agütsüogo" ta State Immunization

Officer, Dr Ritu Thurr-ia ashi.

"Vaccine agirtemji frontline workers 60,957, healthcare workers 15,998, arishi küm 45 ser tempur 201,339 aser arishi küm 18 nungi 44 tsüngda alir 427,328 lir ta paisa ashi.

"Vaccine agirtem rongnungi nisung 465,335-i dose anaprong agiogo. Parnokji frontline workers 47,815, healthcare workers 13,360, arishi küm 45 ser tempur 155,025 aser arishi küm 18 nungi 44 tsüngda alir 248,135 lir" ta Dr Thurr-isa ashi.

Centre-i dose tanabuba nung temolung agütsütsü ayongzük

New Delhi, October 23, 2021 (Agencies): Honibarnü Centre-i state/UT sorkartem dang COVID-19 vaccine dose tanabuba agütsüpur dak temolung agütsütsü ayongzükogo.

Centre-isa state/UT sorkartem dang vaccine agütsüba maparen shitak inyaksü aser taküm küm tatemlen tashi nung tagütsüpur ajak agütsüba mapa inyaksü ayongzükogo.

"Tang tashi nung Covid

vaccine mezung dose crore 71.24 agütsüogo aser iba ya vaccine agütsüpur nütsung yongsük 76% lir. Ano, dose tanabuba crore 30.06 agütsüogo aser iba ya vaccine agütsüpur nütsung yongsük 32% lir" ta Health Ministry-i ashi.

Parnokisa Sorkartemi Co-WIN portal nungi vaccine agütsüpurtem repringshima agütsütsü mepishio.

Vaccine agütsüpurtem indang

tenungtemji dose tanabuba agütsütsü atema district-wise lemsar agütsütsüla, ta Health Secretary Rajesh Bhushan-ia ashi.

Honibarnü state/UT temnungi principal secretary (Health), additional chief secretary (Health) aser state surveillance officer tem den senden amendang Additional Secretary (Health) Manohar Agnani aser health ministry tongti ketdangsurtem aden.

Naga nunger atema tsükchir tulutibaji "ism" lir: Zhaleo



Advisor Zhaleo Rio, aser lenirtem Health & Wellness Centre, Nihokhu küm 50 ajungba nüngshilong sayaba sentong nung tangokba noksa nung angur.

Dimapur, Mongputeni/ October 23 (TYO): Nihokhu yimtsüing nung Health & Wellness Centre (Dispensary) küm 50 ajungba benjungmung October 23 nü mungogo. Kasa anogo Advisor, Sericulture, Excise & Minority Affairs Zhaleo Rio, IAS(Retd.)-i, Primary Health Centre atema mekazüka aliba ali nung nüngshilong lapokja liasü.

Alakteta jaoker ama sentong nung o jembiba mapang Zhaleo-i, Nihokhu yimtsüing Head GB aser külem tenzükertemi kanga meranga inyakba atema parnok nem tenüngsang agütsüba den parnok mapa tajung ya aser talisa yimtsüing ajungkettsü atema pei ali bendanga agütsürtem inyakyim ya tangar asoshi tatishitsü kanga tajung ta ashi. Paisa, health centre ajungkettsü atema takaratiba nung maparen benoka inyaktüsü

tenangzükba agüja liasü.

Angami, Chakhesang aser Sumi lanurtem tawa longjemshiba sentong agiba dak sendakba nung Zhaleo-i, "asenoki Naga nunger tsüingda telungjem atema teyari agütsüba den shisatsü lemsateptsüla aser kati ka tashi itdaksütsüla," ta ashi. Paisa, Naga nunger atema tsükchir tulutibaji "ism" lir, koba tera nungi raktoka intoktsüla, ajita asünungdang lenla ajak nung terenlok atema yimjung aser telungjem adoktsü, ta ashi.

Covid-19 wara dak sendakba nung Zhaleo-i, nisung ajaki vaccine agütsüla, koba tashidak aneptsüba atema masü saka tashidak menatsü nungi jenbotsü atema lir, ta ashi. Paisa, nüburtemi mapang ajak nung teka metsüksü, mask aser sanitizer amshitsü aser tetsüingda ita inyakshitsü

atema tetuyuba agütsür aliba sülen tashi angaa anidaksüla, kechiyong tashidak ya asenden alitsü aru, ta ashi.

Iba sentong ya Jolly Zhimomi lenisüba nung agi aser Er. Ahoto Zhimomi, Head GB-i okila o jembia liasü. Sentong nungsa Ato Area GBs Association mendenbuba Hozheto Yepthomi aser Community Health Officer Liyinbeni natia o tatsütsü jembia liasü aser Nihokhu yimtsüing indang Children's choir aser tebur telok kati ken aten. Maneni Jubilee Planning Board mendenbuba David Zhimomi-i tepela anküp o jembia aser Nihokhu aser Nikhekhu yimtsüing nungi cultural troupe temi sobaliba tsüingsang sayaa liasü. Sentong tetenzüki Nihokhu Baptist Church Pastor Rev. Luhevi Zhimomi-i küm 50 ajungba commemoration plague bendanga agüja sarasadema liasü.

Mopungchuket Ait Laishir Telongjem Dimapur küm 50 Jubilee mungogo

Dimapur, Mongputeni/ October 23 (TYO): Mopungchuket Ait Laishir Telongjem Dimapur tenteter küm 50 ajungba jubilee mung October 23 nü BBIDL hall, Don Bosco School campus Dimapur nung mungogo. Iba sentong ya "Wain Adi" omen nung ajemdaker amung aser tongti o jembir Wb. Imsalensa Sanglir, IPS SP Mon liasü.

Jubilee sentong nung lokti tentet balala nungi lenirtem aser kaketshirtemi shilem agia sentong kanga meraketa agiogo. Ajisüak tensa den mapetba ajanga lokti tulu ayongzüka benjung mamung aser sentong nung adentsü atema jangrartem atema sentong ajak online ajanga sayua liasü.

MALT Dimapur unit ya 1971 küm kaketshir trok-i tenzüka liasü aser tanübo kaketshir 500 shi züngoksema lir.

Sentong nung o jembiba mapang SP Mon Imsalensa Sanglir-i, samanirtemi nukla

aser mangdang tajung yur kaketshir lokti tentet tenzüka toktsüba tsüingsü nung jaajatsü ayongzük.

Pai, kaketshirtem dang kakets shisatsü bushir süra nendak nendaka azüngtsüji kanga tongtibang; tangar degree bushir mesera azüngerji ta ser mezüngi shisatsü angutsü atema tzüraseta azüngtsüji kanga tongtibang ta ashiba den skill development nunga rangloker inyaktüsü mapang tongogo, ta ashi.

Sanglir-i, Nagaland nung sorkar mapa angutsü atema taliba rangloker inyaker aser shirnoki sorkar mapa ngutetdir kanga tajung, ajisüaka idakji ajak tembanger masü aser private sector nunga mapa inyaktüsü atema renema alitsü nüngdaker aser tangaleni orr mapa inyaktüsü atemaa atidaka malitsüla, ta ashi. Paisa, shin o "shisatsüji tashi" ta asüba benoka jembiba mapang, shisatsüji mamshira aji information ka dang akümer anungji iba shisatsüji kija aser

lokti atema amshitsü merangtsüla, ta ashi.

Maneni pai melenshia aoba lima ka nung sobaliba dena kanga kara melenshia aoba angur aser iba amala mapang ka nung asen sobaliba wazüka ayutsüji kanga tongtibang ta ashi.

Hon Jubilee sentong ya Sp. Kipoktsüingba Jamir aser Kr. Toshisangla lenisüba nung agi. Sentong ya Wt. Nüngshisangla-i sarasademer tenzük aser Rev. Maong Lemtur-i kaketshirtem atema mejeta sarasademja liasü. Sentong nungsa Sp. Hangi Jamir-i lokti pelaa agizükba o jembia aser Mopungchuket senso telongjem Dimapur, Mopungchuket Ait Laishir Telongjem aser Ao kaketshir telongjem Dimapur nungi lenirtemia tepela o jembia liasü.

Maneni Jubilee planning committee convener Wb. I. Limatemjen-i melepzüing o jembia aser Sp. Sungkum Aier-i sarasademer sentong tembanga liasü.

Central jail Dimapur nung legal Rights Awarness sentong agi

Dimapur, Mongputeni/ October 23 (TYO): High Court Legal services committee (HCLSC) Kohima Bench-i achayanga October 23 nü Central jail Dimapur nung " legal Rights Awarness Campaign " sentong ka ayongzüka katsüogo. Iba sentong nung tepuokda alir 160-i shilem agia liasü. Iba sentong ya panel lawyer DLSA, Dimapur Tonika Shohe lenisüba nung agia liasü.

Secretary HCLSC & Registrar Kohima Bench Neiko Akami-i o jembiba mapang tepuokertem dang tepuokdak

aliba mapang pei taküm melenshitsü ajungshiba den Higher Court nung pei temeden atema mepeshitsü lenmang sadema lapoker aliba indang metetdaksü.

Paisa, High court Legal services-i High court nung Appeal asüba ken o 14 aser Supreme Court of India indang ken o ka agizüka inyakogo, ta ashi.

Sentong nungsa Chief judicial Magistrate & Secretary DLSA, Seyielenou Mezii-i 432/433/433A CrPC kübok sentences Commute asütsüba tashi indang jembia. Lai

Reformatory justice delivery system dak rangloker jembia, koba tepuokertem atema ajak dang tongtibangtiba, ajita asünungdang parnok tepuokdak nungi chiokba sülen khuret angatetba senso tajung kaka akümtsü, ta ashi.

Maneni Senior Advocate Guwahati High Court, Kohima Bench shri C.T. Jamir-i, temzüing ozüing kübok Parole atema mepeshiba aser tepuokda nungi khen choioktsüba indang onük nung ajemdaker jembia. Iba sentong ya jailor Central jail Dimapur Dr oben yanthan-i tepela anküp o jembir tembanga.

Mangmetongtsür Telongjem Dimapur-i aitsür

Dimapur, Oct.23 (TYO) : Mangmetong nunger jabaso Wb.Aremchang dak kecha tali mali ser Kevechulo Koza aser Keneilekuo Zumu nati October 13, 2021 aonung nokonü agi tepsettsü merangba mapaji kokoa aitsür ta Mangmetongtsür Telongjem Dimapuri sangdong ka ajanga metetdaksüogo.

"Aibelenertem nemji tekaratiba nung ozüing amertemi

tapet temerenshi agütsütsüla. Ozü jabaso Aremchang Imchen, shiba tang tashi tasütaküm tsüingda mozü kidang lir, pa nem yakta taneptsü agüjang ta sarasademtsür," ta kasa sangdong ajanga Mangmetongtsür Telongjem Dimapur nung mendenbula Wt. Dr.Sentila Longchar aser Tongti zülür Wt.C.Limala Imchen nati metetdaksüogo.

MCTE Mokokchung pur Freshers' Day amung



MCTE nung azüngertemi Freshers Day sentong nung shilem agir

Mokokchung, 23 Oct (TYO): Mokokchung College of Teacher Education (MCTE) pur 10buba Freshers' Meet sentong "Avanzando - moving forward" omen dak rangloker 22nd October, 2021 nü parnok college kilem nung mungogo, ta MCTE osang ka ajanga metetdaksü.

Iba sentong 3rd semester nungi Jatina aser Muiliba nati ketdang asü. Vice Principal, Dr. Temsurenla-i tarurtem pelaa agizük aser 3rd semester nungi MCTESU AGS, Imertetba aser tasen arur (Freshers) tenüing

nung Moalemba-i jembia liasü. MCTE Principal, T Alemla Longkumer-i tasen arurtem dang nendaka angazüker tesayur tajung kaka akümtsü asoshi ajungshia liasü.

Mezüing sentong temer külen tanabuba wawa-menü sentong nung tasen arurtem metetpelaba mapang agiba den 3rd semesters nung azüngertemi kentenmenü shilem tapu balala ia kanga longsotepor tatem nung telok külemi sarasademmer iba sentong tembang, ta kasa osang nungsa metetdaksü.

Noklak district nem healthcare facility balala agütsü

Kohima, Mongputeni/October 23: Nagaland nung district tasentiba Noklak nem lokti tentet balala-i October 22 nü health facility balala agütsüogo.

EKAM Foundation, Chennai-i, District Hospital Noklak atema healthcare equipment tem alitsü asoshi sen lakh 50 agütsü aser Shanti Medical Information Centre Kerala-i, latest medical technology aketba ambulance ka den küm pongu atema nurse aser gari anir dena agütsüogo.

SMIC Director Uma Preman aser EKAM Foundation operations head Sridhar Emmadi nati ambulance indang sabi aser kuli kaketterem aser sen lakh 50 indang cheque, Minister for Health and Family Welfare S Pangnyu Phom nem pa indang official chamber nung amokja liasü.

SMIC Director Uma Preman-isa, centre-i yakta sen crore 5 alang school project ka Noklak district nung tentüingdakba tanurtem nem angati education agütsütsü atema tenzüktsü, ta ashi. Centre yagi iba school ya küm pongu atema angaayangsü aser iba sülen state nem bandanga agütsütsü.

Senden nung Minister Phom-i, COVID-19 wara ya Nagaland aser alima atema temaotsü ka ama lir, kechiyong tangbo health care facilities tajungba agütsütsü atema rangloker inyakdar, ta ashi.

Paisa, Nagaland nung wara metenzük tsüingda healthcare facilities agi anünga liasü saka COVID-19 wara poktetba sülen state nung health facilities tajungba kümogo, ta ashi. Wara mepoktet tsüingda Nagaland nung oxygen cylinders 14 dang liasü saka tangbo district timba nung oxygen plants amenokba sülen state nung medical oxygen teperi lir, ta Phom-i ashi.

Ato Kilonser Narendra Modi-i, linük kübok tesem ajak nung medical facilities ajungkettsütsü atema rangloker inyaba ajanga iba jenjang ajangzüketetogo, ta Phom-i

ashiba den state nung healthcare infrastructure ajungkettsüba atema centre sorkar dang kanga pelaba lemsatop.

Maneni health minister-isa, medical staff tem dang parnok tata tesemtem toktsür maotsü aser nüburtem aser talisa kinük nung aliba tesemtem nung alirtem nem health services tajungtiba agütsütsü mepeshia metetdaksü.

Kasa mapang nung Noklak district nem medical tsütsü teyari agütsüba atema lokti tentet ana dang kanga pelaba lemsatop aser tarutsü nunga tanga district tem nema facility balala agütsütsü imlaba lemsatop. Minister-isa, item lokti tentetem state-i anir aruba atema Joint Secretary Home Renny Wilfred dang kanga pelaba metetdaksü.

Sorkar aser department tenüing nung Phom-i lokti tentet anaprongla dang kanga pelaba lemsatop.

Tarutsü nunga tanga sector nung terenlok maparen nung longjemer inyaktüsü atema lokti tentet ana dang teyari meshiba den sorkari parnok inyakyim nung teyari agütsütsü pai tenangzükba agüja liasü.

Phom-i, Myanmar den arrtsü nung aliba district terenlok asoshi sorkari rangloker inyakdar, ta ashiba den district nung aliba nüburtem dang lenla ajak nung terenlok atema item lokti tentet aser sorkar agencies tem den teka amteper inyaktüsü ayongzük.

Advisor for Printing & Stationery, H Haiying aser Advisor for Fisheries, Evaluation aser Economics & Statistics, L Khumo, DC Noklak Hiazu Meruia district nem teyari agütsüba atema lokti tentet ana nem ya tenüngsang agüja liasü. Iba sentong nung Mission Director, National Health Mission Dr. I. Talitemsula Jamir aser Deputy Director, NHM Dr. Manyau Phom nata dena liasü.

Guwahati nung US Consulate General office ka lapoktsü mepishi



Consul General Melinda Pavek-i Assam Governor Prof Jagdish Mukhi ajuruba noksa nung angur.

Guwahati, October 23, 2021 (Agencies): Assam Governor Prof Jagdish Mukhi-i Kolkata nung aliba US Consul General dang Guwahati nung Northeast region atema Consulate General office ka lapoktsü mepishiogo.

Hokolbarnü Consul General Melinda Pavek-i Raj Bhavan nung pa den ajurutepdang Governor Mukhi-i iba temepishiba ya agütsü. Iba mapang tenati rongsenkettsüng nungi tenzüker US aser Assam

tsüngda tesentaktep akangshitsü onüktem lemsatep. Governor-isa Consul General den H1B Visa indang jembia aser idangji visa guidelines reprangshitsü teyari meshi.

H1B Visa inyakyim kanga tejen asüba agi India nunger aika Canada-i aoer. Ajisüaka yanglushira India nungeri US-i ang aotsü ta Governor Mukhi-i ashi.

Paisa Consul General dang Guwahati nung northeast India atema office ka aser United States Information Service (USIS) kaketnang ka lapoktsü mepishi.

Iba mapang US Consul General Melinda Pavek den Consul for Political and Economic Affairs Sonia Laul aser Vice Consul Clinton Walls, Political Affairs Specialist from US Consulate General, Kolkata, Tinku Roy na aden.

Mizoram nung sen crore 6 alang heroin apu

Guwahati, October 23, 2021 (Agencies): Mizoram kübok Kolasib district nung Border Security Force (BSF) sepaitemi sen crore 6 alangba heroin apu. National Highway-306 anasa Chhinluang yim nung BSP sepaitemi mita atadang Ramneithanga ta ser mozü

shibelener ka apu. Pa ket nung heroin gram 808.6 bena lia apu, ta BSF otongdar kati ashi. Narcotics Drugs and Psychotropic Substances (NDPS) Act kübok Excise and Narcotics department ket nung pa agütsüogo, ta otongdarisa metetdaksü.

Mozü ji Myanmar nungi bener aruba ta temolung malemer.

Myanmar-i India kübok state pezü- Mizoram (510 km), Arunachal Pradesh (520 km), Manipur (398 km) aser Nagaland (215 km) den arrtsüa lir.

Cachar nung Myanmar nunger 5 apu

Guwahati, October 23, 2021 (Agencies): Assam Police-i Cachar district nung Myanmar nunger pungu puogo. Parnoki ozüing alema India-i aruba atema apu. Par punguji Thang Khawm

Pau (21), Khen Khan Kham (19), Pau Hawmliam Mung (23), Cin Aih Mang (23) aser Pau Biak Muang (19) nunger ta jangjaogo. Myanmar nungertemji Mizoram adena Delhi-i aotsü lia

apu, ta police-i ashi. Parnokji 468(forgery) of IPC, relevant sections of Foreigners Act, 1946, Passport (Entry into India) Act, 1920 aser Passport (Entry into India) Rules 1950 kübok tai tonglokja apu.

GMC ketdangsür ka süpokrem agidang apu

Guwahati, October 23, 2021 (Agencies): Assam police nung vigilance & anti-corruption ketdangsürtemi Guwahati Municipal Corporation (GMC) nung assistant engineer ka apu. Assistant engineer jagi contractor ka ket nungi Rs 5,000

süpokrem meshia agiba atema tai tonglokja apu. Iba nisungji Dibakar Mali ta jangjaogo aser pai contractor ket nungi süpokrem meshidang apu. Mali-i contractor dang official mapa kar inyaksütsü atema Rs 5000 meshi ta osang

angazüker. Iba atema ken o ka benokba sülen anti-corruption cell-i Hokolbarnü Fancy Bazar nung Mali pa indang office nung apu. Pa police ket nung yua lir aser Prevention of Corruption Act kübok ken o ka benokogo.

Myanmar arrtsü anasa Rs 1.56 crore jenjang kozüjang apu

Aizawl, October 22, 2021 (Agencies): Mizoram nung Myanmar den arrtsü anasa Assam Rifles aser Customs department-i Rs 1.56 crore alang kozüjang puogo. Champhai district kübok

Khuangphah yim nung mita aodang kozüjang seret 40,000 apu, ta Assam Rifles-i sangdong ka nung metetdaksü. Osang tejanga ka angazükba sülen iba mapa ya inyak, ta parnokisa ashi.

Mizoram nung aser talisa India-Myanmar arrtsülen kozüjang miima shibelenba ya khuret ka lir. Assam Rifles-i ozüing alema shibelenba maparen anema maneni inyaksü, ta AR sangdong nungsa metetdaksü.



Mizoram Youth Commission-i Mizo singers aser musicians ajungkettsü atema Musicconnect Asia aser Centre for Creative Excellence den Memorandum of Understanding (MoU) den sign asü dang agiba noksa angur. Aizawl nung MYC chairman aser MLA Dr Vanlaltanpuia-i Musicconnect Asia acting president Kaushik Dutta aser Centre for Creative Excellence tenüng nung Bollywood producer Shubho Shekhar o pa kinungtsü Sucheta na den MoU nung sign asü.

MULUNG NEN O




Imtiomen (Akhoya)

15:02:1947 - 12:10:2021.

Onoki teti meima aliba obala asür Imtiomen ajungbena iba akümlir wadang tembanger, onok asüku tejashi nung mulung animesüngzükteti alidang, yimtak aser bendang balala nung aliba yimtsür yimer, tembar aser temeimertem, lokti aser kija kibong shirnokisa nübo, rongsen aser sarasadem agi onok dang meima yaritepogo, nenok ajak dang pelaba lemsateper. Takar Tsüngremi nenok mapa tajung asoshi maneni moajangma ta sarasademtsür.

- Temeim kinungtsü, Chirnur, Semchir aser Kinungertem.

Piles Anepaluba - H. Umar Chesam dang alakteta pelaba metetdaksür. Piles, Fistullah, Gastric, Sinus aser Tonsil-Athjma agi ni kangshia liasü aser Rectum nungi azü alu dang mapang talangka item timtem nungi junga taneptsü mangu. Ajisuaka, tang **H. Umar Chesam contact no. 9863758600 / 8416087414 National awardee H. Umar Chesam** Address: **Burma Camp 2nd Police point opp.** tetuyuba nung anidaka surgery kecha magii (non-surgical) anepalur anogo ishika tsüngda ni taneptsü ngua liasü aser iba sülen tanü tashi kü temang nung timtem kecha mali. Time: 9 AM - 5 PM Yours sincerely - David Sumi, Add: Burma Camp



Happy Birthday

TENÜNG : KIMALONG LONGKUMER

Tasoba Anogo : October 24
 Küm : 4
 Talidak : Half Nagarjan

Tsüngremi jabaso küm pezü tashi len anir aruba atema tenüngsang agütsür. Maneni pa taküm nung Tsüngrem temoatsü aser taochi lidakjangma ta sarasademtsür.

-Temeim, Oja, Oba, Oya aser kinungertem.



AJYCP-i Dibrugarh nung totzü jenjang atuba anema lungkak ait



Dibrugarh, October 23, 2021 (Agencies): Upper Assam kübok Dibrugarh nung AJYCP züngsemtemi totzü aser kechisarena nung jenjang atuba anema lungkak aitba sentong ka ayongzüka agi. BJP sorkari jenjang atuba maziüktetba atema lungkak aitertemi yimiyim ayim aser Centre dang mapa inyaksü akhang.

Sorkari totzü nung jenjang atuba maziükra state ajungalen lungkak aittsü ta AJYCP-isa amokmerenogo.

"BJP-i nübortem nem anogo tajung bentsür arutsü ta nangzüka sorkar yimsü asütsü tashi angu saka parnok inyakyim ajanga middle aser poor class tem samatsüogo. Parnoki Ambani aser Adani nunger atema inyakba anentsüla aser nübortem atema inyaksüla" ta AJYCP Dibrugarh district AJYCP president Bhaben Sonowal-i ashi.

"Petrol aser diesel jenjang kanga atuba azüoktsü atema Centre-i mapa inyaksü akhang. Anogoshia petroleum jenjang atur. Totzü jenjang atuba shi kechisarena ajak nung jenjang atur" ta Sonowal-isa ashi.

NPP candidate'er kidang grenade pokdaksü

Guwahati, October 23, 2021 (Agencies): Hokolbar Thoubal district nung mejangjatetba nisung kari Nationalist People's Party (NPP) candidate N Diten'er kidang hand grenade ka pokdaksü. Yasüng 6.45 ako meta Ukhongsang Mayai nung iba lendong atalok, ta police-i ashi.

Iba lendong nung nisung yiruba osang kecha mali, ta parnokisa metetdaksü.

Taoba ita ishika Diten-i assembly elections atema nüboyima arur saka grenade apokdang pa kidang maliasü.

Iba dak sendakba nung bushisüngdang ka tenzükogo aser shirnoki grenade pokdaksü'ar osang kecha mali.



TIR YIMYIM YIMOBILEM (EDITORIAL)

DIMAPUR AMUNGNÜ, MONGPUTENI(OCTOBER) 24, 2021

Kibubai asenok dang tajung sayuogo

Asenoki anogo shia Tsüngrem dang nungi tajung imlaba ama Tsüngremia asenok dang nungi tajung imlar. Ajisüaka, aiben nisungi Tsüngrem peladaktsüsübaji teindang shisatsü aser ochi mapatem agi masü saka sübokrem agütsür ama ali rongsen agütsüba agi peladaktsüsü meranger. Iba ama shisatsü meindang aser ochimashi jakla agi Israel nungertemi Tsüngrem peladaktsüsü merangba tamashi mapatem ngua, Mika ainkeri parnok dang nungi Tsüngremi kechi imlar aser kechi meimlar, itemji sangoktsüba Mika tapu nung asenoki angur. "O nisung, kechi tajung pai Pai nü dang sayuogo aser ochishia inyaksü, taochi sayuba mapatem meimtsü aser Tsüngrem den ajemalua jajatsüba dak alaka, ano Kibubai na nungi kechi akanger?" ta Mika 6:8 nung shia angur. Iba lai tekong nung Tsüngremi asenok nem inyadaktünüba mapa tejangja asem shia angur. Mezüngbubaji, Pai asenoki inyakba mapa ajak nung ochishia inyadaktünür. Asenokibo tangar dang nungi ochi aser tajung imlar saka asenoki tangar dang nungi imlaba amaji asenoki meinyaktetra, asenok Tsüngrem tsüngdang tabensa masü. Asenoki tangar asoshi kechi inyaker, mapa tulu tila ta masü, ochishia inyaksütsüla. Aji oda, asen den külemi inyaker aser medemertemia asen dak temulung lemtetsüsa asenok dak ochi jakla alitsüla. Kodang asenoki tangar dang ochishia benschir, asenoki Tsüngrem tsüngdang ochishia inyaker. Tanabuba nung, asenok dak taochi aser imlibilem meimba shisatsü alitsü Tsüngremi imlar. Iba jagiang, Tsüngremi Israel nungertem rongnung kati ka dang aochitepa benschidaktünüba agi, kasa Mika tapu nung, Tsüngremi parnok Egypt lima alar tia nung lia Pa taochi agi parnok anitetba anogo aser mapatem nenshia metetdaktüba asenoki angur. Nisung asünungji, asenoki aiben tangar tsüngdang aibelener aser parnok dang nungi taochi aginür saka asenokibo tangari asen anema o tamajung tilaka jembiba asoshi dena taochi mesayutetter. Kodangsa, tangari asen anema langka tamajung inyakdir, idangji asenokia tamajung ka agi küpzüksü asoshi bilemdaktsübaji Satani asenok atidanger ta asenoki metettsüla aser iba tatidangji asenoki koktetsü. Iba jagiang, Rome 12:17 nung, "shinga nema tamajung melen tamajung tagütsü saka ajak dang tajung inyaksü ta bushiang," ta shia angur. Aji oda, tekümdangtsü o ka asenok ajak atema Laishiba nung angubaji, Apijemtsü Shin 17:13 nung," nisung kari tajung melen tamajung agütsüra, tamajung jagi par ki kodanga medoktsütsü," ta shia aliba ya asütsü. Atangji, asenokia tamajung agi kodanga medoktsüba kibong karbo meteta lir na? Tasembuba nung, Tsüngremi asen nem inyadaktünüba mapaji, Tsüngrem mapa nung jajar ser nung pei ajung aser pei ulu shisanga masü saka ajemalua Pa den jasadaktünür. Tsüngremi asen dak nungi mapa ajak nung imlaba yimya kaji ajemaluba ya lir. Atangji, nisungibo peisasa tila kümer tangar den ochishia inyakba aser taidok agütsüba ajakji lapi mapa aser kodanga tangar menepa malitsü purtem ama bilemer. Ajisüaka, Tsüngrem tsüngdangbo yamaji masü, kechiyong Tsüngremibo asenok ajemaluba nungang Pa tashi sayuner. Ibayongji, Yisua Mathi 5:5 nung ajemalurtemiang alima senmang amangtsü indang shia angur. Aji oda, asenoki alima nung ya ochi taküm, taochi aser imlibilem meimba shisatsü aser ajemaluba jakla agi tangar temoatsü aser teyari angutsüsa litetra, Tsüngremi asenok dang nungi aginüba tenlaji aji asütsü. Ashiko, ainker Mika mapang Israel nungertemi benschiba amaji, asenokia tenla kidangi tenla sen aika bener aoba agi Tsüngrem pelatsü ta bilema alitsüa akok. Mesüra asenoki ali rongsen tulu arogo nem agütsübaji Tsüngrem peladaktütsü atema agüja alitsüa akok. Ano, Mika 6: 7 nung shia aliba amaji, asen kibong nung tambusang mesüra tantsüla Tsüngrem tenzüka mapa nung inyadaktüba agi Tsüngrem tsüngdang asenok taidok angutsü amai asenoki bilema alitsüa akok. Ajisüaka, Tsüngremi asenok dang nungi aginübaji itemji masü saka Ochi inyakba, temeim sayutetba aser ajemalua Tsüngrem den jajaba taküm aginür.

OLEMSABANG

Hindu Tamangba Yimsü Kübok Malitsü Ne Meyongnem Nüngdak

Meyu Changkiri

(Yashi adok nungi...)

Tanga tamangba züina modaktsütsü asoshi yimtsüng kar nungbo kibongtem nung sarasadema aliba mapanga sünga azükba, ki rongdoktsüba aser mangsa yimdong nung maksüa jasadaktsüba aika ajuruogo. Hindu tentet teloki, Bajrang Dal teloki 1999 nung Australia nunger leprosy hospital nung doctor Graham Staines aser par chir ana gari telong nung mi senloka rongseta südaktsüba, ano 2008 küm Kandhamal nung Khristan tamanger 39 tepsetba, tenlaki 395 rongdoktsüba, 600 yimtsüng rongdoktsüba, 5600 kiojen, dokan nungi oset-ts?set rakzüka bener aoba aser nisung merijang aika ki maka kümdaktsüba atalokogo. Item ya asaa Khristan mekümdaktsütsü amokmerenba aser rishikangba lir. Ita ana tejaklen Delhi nung tenlaki raksatsüba osang nguogo. BJP yimsüsüba arur Muslim aser Khristan dak tashiyim amshia rishikangshibaji küm shia 800-1000 ka shibosa asür ta ashir. India nung BJP yimsüsüba arur religious mob kümteta, Government tazüokba kecha mali ama, Muslim aser Khristan attack süyonga, tetsür dak tashiyim agi medemer tepseta yutsüba osang angur. Saka aiben Governmenti tenük amor yutsür. Ano tesüngmangtsükaji RSS and VHP telokibo India ajunga nung Ghar Wapsi, tetezü tanaben meyipa Hindu yimsüi anir aitba poja inyaka aoba angur. Assam Chief Minister Himanta Biswa Sarma-ia India nunger ajak mapang ka nungbo Hindu liasü anungji lungjema alitsü atema meyipa arutsüla ta jembiba nguogo. Ozüng balala ajanga aser tashiyim mapatem ajanga yamaji Khristan mekümdaktsütsü nokdang. Kechiba süra, India ya Hindu yimsü amanger lima ta angatetba ajanga yamaji inyaker.

India nung tamangba yimsü telok tilatemi (religious minority) ajuruba timtemji aiben Media nung osang magütsür. Tamangba yimsü meji taküm samaba, temang yiruba, lokti nungi jendokba, mapa agienadokba, rongsen aser kiojen samaba, kibong nungi pilaa alitsüsa akümba, tila tanurtem tsübuseta ainba, tangar matsüngdang maksüdaktsüba, aser yamala aika ajurur.

India nunger Otsü meyipshiba

India nung Khristan lenir, Vijayesh Lal, ajanga ashiba agi India lima nung kin ajak Hindu yimsüsüba kübok lidaktsütsü merangba tasa ya metettsüba kanga dang tongtibang (It is very important to understand the politics of religious nationalism in India). Nüburtemi angatet nung dang kobala yimden lenir shimtsü nüburtemi metettsü. Ya kanga shitak. Khristantem atema dang masü, saka senso pur ajaki ya meteta alitsü kanga tongtibang. India nung pei kin ayak jangja ayutsü, wazüka ayutsü aser pei oshi jembitsü, sayutsü temeten atema noktaktsüla. Sangh Parivar ajanga item otsü zülushitsü merangba, item tasa balala ya tanü alimai meteta arur. South India nung Darvidian aser North East India nung Monoploid shilu ya züngdoker otsü zülushitsü meranger. Küm 300 tema Mughul yimsüsüba indang Indian history nungi aidoktsü merangba, tat. agi Taj Mahal, Lal Qila, Juma Masjid ya Shah Jahani yangluba masü, Hindu nunger chubai yanglu ta otsü meyipshir. Aser parnok India lima rangben Hindu yimsüsüba kübok ayutsü merangba, aser iba ama yimsü ka kübok lidaktsütsü merangba (Religious Nationalism) ya metettsü kanga dang tongtibang. Home Minister Amit Shah-i yamai ashi, "To preserve our ancient philosophy, our culture and the memory of our freedom struggle...there is at least one language, Hindi, that the nation knows. If Hindi is taken out of our freedom struggle, the entire soul of the struggle is lost," Tetezü, tetsü-tebou otsü aser wainshin wazüka ayutsü asoshi Hindi ajaki jembitsüla. Hindi ajanga itemji wazüka ayur. Hindi jembiri nüchiso bener aru anungji Hindi mamatsüla ta ashirba. Yamaji Hindu atsünga otsü meyipsaba asenoki ajangshia arur. Hindu Nationalism tangatetba ajanga Hindu aser Hindu tamang ya ajak rongnung mezüngbuba aser tulutiba yimsü ka ta sayur. Tangartem ajak Hindu yimsü kübok second-class citizen ama parnok angateter. Nüngdakra, tanga yimsü nung amangertemjia tashiyim amshia Hindu kümdaktsütsü merangtsüla ta parnok inyaker. Aser yamaji India lima nung Hindu yimli (Hindu Rashtra) ka yangerteta Hindu yimsüsür (Hindu Theocracy) kati yimsü asütsüla ta parnok angateta meranga inyaker, tatishitsü agi, Yogi Adityanath, Vishwa Hindu Parishad (VHP).

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazüngerü angateta agitsü mepishir**

2021 Gospel Music Association Dove Award sentong agiogo



October 19, 2021 aonung Nashville, Tennessee nung 52buba Gospel Music Association Dove Awards sentong nung New Artist of the Year award anguba sülen Maverick City Music telokpur tangokba noksa nung angur.

Nashville, October 23 (Agencies): October 19, 2021 aonung Nashville, Tennessee nung 52buba Gospel Music Association Dove Awards sentong agiogo; iba sentong nung Maverick City Music teloki New Artist of the Year award ngua liasü.

Lipscomb University indang Allen Arena nung ayongzüka agiba sentong nung CeCe Winans aser Jason Ingram narponglai award pezüzü angur; Winans-i Gospel Artist of the Year aser Ingram-i Songwriter of the Year (Non-Artist) angur. For The KING & COUNTRY telokia Artist of the Year densema award asem nguogo.

Iba sentong nung osangtajung kentener taintem aser lanurtem aika aden. Khristan ken dak sendakba award sentong tulutibaji Dove Awards ya lir.

Pastor Steven Furtick-i aniba Elevation Worship aser Chris Brown-i Song of the Year ("The Blessing" ken) densema award asem angur aser Maverick City Music teloki New Artist of the Year award angur.

Gospel Music Association Dove Awards atema taküm tenüng 4,600 agütsüba nungi nominees shim. Taküm iba sentong omenji "Stronger Together" liasü aser iba sentong nung CeCe Winans, Lauren Daigle, Maverick City Music, Elevation Worship aser Hope Darst nung densema nisung aikati shilem agia ken aten.

Iba sentong ya osangtajung kentener, Jonathan McReynolds aser Natalie Grant na leniba nung agi aser Grant-i la kinümbu Bernie Herms aser lar jala jakrep den külemi "Weapon" ken aten.

Sentong tembangba sülen osangbenertem den jembidang Grant-i, "Tanep saakba sülen

kü kinümbu Bernie künati onoki ken atenba dang nungibo Tsüngrem adenba tuluba asütsü atema sarasadem liasü. Onok sarasadem Tsüngremi langzübaji onoki meteta liasü," ta ashi.

Osangtajung kentener CeCe Winans-i tematiba award Gospel Artist of the Year, Gospel Worship Recorded Song of the Year, Gospel Worship Album of the Year aser Inspirational Recorded Song of the Year awards ngua liasü.

Jobe Kari, Cody Carnes & Elevation Worship-i atenba ken "The Blessing" ajanga Song of the Year award angur aser Brandon Lake-i Songwriter of the Year (Artist) award angur.

Elevation Worship aser Lake-isa Worship Recorded Song award angur ("Year for Graves into Gardens" ken ajanga), Elevation Worship aser Maverick City Music-i Worrship Album of the Year awar angur (Old Church Music ken) aser Elevation Music-i Recorded Music Packaging OTY award angur ("Graves Into Gardens").

Taküm Elevation Worship aser Lake-i nominations tenet ngua liasü.

Osangbener den jembidang Elevation Worship telok nungi Chris Brown-i, "Onok ajak Tenla kidang külemertem lir aser onoki ozü Arogo tenzüksü jangrar. Ibayongji onoki taküm bendanga agütsü. Ozü Arogoi küm aika ken zülua arudar aser kensep record süa tangbo iba jenjang ajangzükteter," ta metetdaksü.

For KING & COUNTRY telokia award asem angur aser itemji- Artist of the Year; Christmas/Special Event Album of the Year (A Drummer Boy Christmas) aser Long Form Video OTY award (Burn The Ships

Concert Film) densema lir. Par telok category pongu nung nominate süa liasü.

Tekülem aser tetushi kentener telok Maverick City Music-i "New Artist of the Year" award angur. Iba award atema Hope Darst, CAIN aser tangartema nominate süa liasü. Maverick City Music-isa Worship Album of the Year (Old Church Music) award angur.

Osangbener den jembidang tekülem aser tetushi kentener nüngtugu, Chris Tomlin-i "Tekülem aser tetushi kentener temi melungsoa tangar den longjemer kentenba atema pelar. Talisa tekülem music nung longjemba atema pelar," ta ashi.

We The Kingdom teloki Pop/Contemporary Album of the Year award (Holy Water ken) aser Contemporary Christian Artist of the Year award angur. Iba telok nung züngsemtemji timbaka kinüngertem lir.

Hip-hop artist Lecrae-i Rap/Hip Hop Recorded Song of the Year award angur (Deep End ken).

KB-i His Glory Alone ken ajanga Rap/Hip Hop Album of the Year award angur.

KB-i, "Tanü tashi onok ya industry kabo maküm, ajisüaka onoki inyakba ya anentsütsü makok. Item ama music (Rap/Hip hop) ajanga Tsüngremi mapa inyakba ni jangjaogo. Nisung kar den ochi lemsateptetba rongnung hip-hop music densema lir. Alima nung nüngtugu music rongnung iba ya densema lir," ta metetdaksü.

"Ni osangtajung kentem nung Yisu tetshiba atema pelar. Yisu tiyongtsü südaktsüba ajanga ni takoksa angubaji sentiba. Kü kentem ajanga nisungtem taküm melenshiba ajanga ni pelar," ta paisa ashi.

ANO GO ABEN TSÜNGREM DEN

NAI AJEMALUANG

Kü nübur shirnok kü tenüng agi ja-a lir parnok sasa ajemaludi süra, aser sarasademra...idangji ni kotak nungi angashitsü. II Puti. 7:14

Tsüngremi aginüba yimya mezüngbubaji ajemalu ya lir. Nisung aikati ajemaluba yimya ya mebushir kechiaser iba ya tashi maitba yimya mesüra lapi yimya amai bilemer. Aji saka Tsüngrem O nungji Tsüngremi asen taküm nung Kibubai mapa inyaktsü mezüng tayongzükbajibo ajemaluba ya lir.

Laishiba nung Tsüngrem tenzüker shirnok ajemalua alima tia ajak aremzüka Kibuba dang ataa liasü parnoki Kibubai parnok ajungket aser alima senmang amangdaksü. Yosef takümji ajemaluba taküm ka liasü. Pai taküm tia balala aika ajuru, saka Kibuba nung ajemalua tila kümer, pa takoksa arema atabayong Tsüngremi pa tepuokdak nungi chuba menden nung mendaksü. Ezekiah chubai kodang Tsüngrem terasaba angur pai aser Israel nüburtemi Kibuba matsüngdang ajemalua aküm nung Tsüngrem terasaba pa mapang nung maru (II Puti. 32:26).

Kibubai ajungkettsü mulunga lirsür nung ajemalu mesütetbayong Pa narong ne tsütsü mali asütsü akok. Kechiyong Kibuba tenangzükbabo shiri ajemalua akümtsü mulunga lira parnoki ajaba angashitsü ta shia lir. Khen ajemalushidi, khen aremzükdidi, khen tila kümdi, Pai ne ola angashitsü.

Sarasadem

Kibuba ne tsüngdang ni ajemaludi, kü asükümba tanela indoker ne tsüngdang tila küma ni arur, nai ni agizükang. Amen.

UN-i Pakistan dang Khristan, Stephen Masih chiokang ta akhanger

October 23, 2021 metetdaksü.

(Agencies): UN nung meimchir temeden atema inyaker mongintemi Pakistan linük dang Khristan, Stephen Masih tangsa chioktsüla, ta mepishiogo.

Stephen Masih ya Sialkot district nungi lir. Pai Tsüngrem mezüngmeshiba ozüng kübok aibelenogo, ta pa nem tai tongloktsüba sülen pa küm ana dak tema jail nung puoka lir, saka tang tashi ken o mangadanger.

October 21, 2021 nü UN nung mongintemi sangdong ka ajanga Pakistan linük dang, "Tsüngrem mezüngmeshiba nung ajemdaker Masih reshikangshiba aser tang tashi pua ayuba atema onoki tebilemtsü akar. Judicial aser jail ketdangsertemi pa dak mokokmin aliba aser temang majungba meteta dang lir saka pa dang tim mesüi benshir," ta metetdaksü.

Parnokisa Pakistan nung ketdangsertem dang Masih anema benoka aliba ken oji repringshitsü aser pa nem tai tonglokja aliba ajakji agienba sülen pa aser par kibong nem security agüjang, ta mepishi.

UN nung mongintemisa, Pakistan nung ketdangsertem aser tangartemi Khristanem Tsüngrem mezüngmeshiba ozüng nung ajemdaker minorities anema inyakba atema UN-i tebilemtsü akar, ta

2019 küm March ita nung Imran Pura Badian yimdak Masih aser par kiyong ka na tsüngda mangatettep ka adokba sülen pai Tsüngrem mezüngmeshiogo ta pa nem tai tongloktsü aser lokti kati par ki rongdokja liasü.

Iba sülen local police-i pa anema ken o ka benok aser 2019 küm March 15 nü pa pua liasü, ajisüaka ita asem sülen ang pa dang, nai Tsüngrem mezüngmeshiba atema na anema ken o benoka lir, ta metetdakja liasü.

"Onoki Pakistan sorkar dang international human rights tetuyuba benshitsü aser tamangba yimsü ajak sadema amangdaksütsü atema mepishir. Kiyonger tsüngda mangatettep adokba sülen yimsü nung ajemdaker judicial-i nisung ka amokmerenba aser Tsüngrem mezüngmeshiba ozüng kübok tai tonglokja tasüba temerenshia angutsüsa akümbaji tesasatsüka lir," ta UN-isa metetdaksü.

Osang angazükba agi, Masih anema benokba ken oji tang tashi mangadang mesüra pa anema kuli agüja mali.

Sialkot district jail nung Masih nem medical treatment magütsüba den külemi ken o angadangtsü atema mapang shia anogo atsülanger, ta UN mongintemisa metetdaksü.

OLONG PAITEP # 5975

1			2					3		
4								5		
						6				
			7							8
		9								
								10		
11										
13										

TIPILEN

- 2. Teka mapa tajung - (8)
- 4. Anakshinüba - (5)
- 5. Süoshi agi tazü - (4)
- 9. Aria bilemtep - (7)
- 11. Ajemalu ozü - (4)
- 12. Tzü an - (5)
- 13. Teben teloktep - (8)

LANGTSÜNGLEN

- 1. Anepalua inyak - (7)
- 2. Teptsü - (4)
- 3. Nok agi raratep - (6)
- 6. Kibong aküm - (4)
- 7. Nüji masü - (4)
- 8. Taruba küm - (7)
- 9. Teka shidok - (6)
- 10. Meputep/Mapet - (4)

OLONG PAITEP # 5974 TELANGZÜBA

TIPILEN :

- 1. Yimlibilem, 4. Anak, 5. Tangar,
- 7. Aya, 8. Arong, 11. Par,
- 13. Lemjem, 14. Oagi, 15. Mulung.

LANGTSÜNGLEN :

- 1. Yongya, 2. Moko, 3. Marok,
- 5. Teronem, 6. Nung, 8. Amajok,
- 9. Jangzü, 10. belem, 12. Rong.

KOMA SÜLA TELANGZÜBA

Q. Tang amai Nagaland nung oposition telok mali ser assembly election agitsü mapang tonga arununga koma süla?

Tang amai opposition mali election agi nunga koma süla ta masü mali-sa agitsü asütsü. Pei ajong asoshi dang nemzür NPF nemji taruba election nungbo nübur-i vote magütsütsü tsübutür."

- M. A. Naga, 4th mile.

Oposition party lir ser nung center nungi sen aruba 100 nung 50% Nagaland government lenirtemi achir nung oposition maliba government aküm nungbo Nagaland atema center nungi sen aruba ji 75% bo parnoki achitsü sen chiaka mejishi sen komaser achitsü iba tebilemba nungji oposition maliba government ji tentetnürba, oposition party melira complain asür malitsüji.

-B.W

Nagaland nung tang ama apposition mali assembly election agi nunga party tasen karbo adoktsü. Tatishi agi RPP. Saka tia makai RPP ji govt. Mekümtet nungbo asen state ya worst state akümstsü. Nübor kanga jenjang tamajungba akümstsü.

-WhatsApp

Tang ama opposition maliba mapang election agitsüsa aküm nungbo NDPP ticket jenjang tasak küma yokteptsü.

-SMS

Yamajika asünungbo NPF Party-pur timtem tuluka alutsü ami repringtetter.

-SMS

TANÜBO NAI LANGZÜANG

Q. Koba linük nung Cambrian Patrol Exercise ayonga agi.
A.Australia B.India C.UK D.US

(Taruba adok nung onoki langzütsü)

YASHI ADOK TELANGZÜBA : U£1m

AO OSHI ANGAZÜKDAK:

TANÜ ANGAZÜKTSÜBA OJANG



Lemluwa

(n) mei mapang (summer)

* Lemluwa dang tashidak wara kanga pokteter.

Lempet

(v) shitak melemsatet (mistake in distribution)

* Tanurtemi benjong nung chitem lempet.

NAI-A YA METETTER MA

November 2021' Nungi Teküboklen Agüja Aliba Smartphone Nung WhatsApp Mamshitettsü:

1. iPhone iPhone 5 iPhone 6S Plus iPhone SE	Optimus L7 Optimus L7 II Dual Best L7 II Optimus F6, Enact Optimus L4 II Dual Optimus F3 Best L4 II Best L2 II Optimus Nitro HD Optimus 4X HD Optimus F3Q	Ascend Mate Ascend D Quad XL Ascend D1 Quad XL Ascend P1 S Ascend D2
2. Samsung Galaxy Trend Lite Galaxy Trend II Galaxy SIII Galaxy S3 Mini Galaxy Xcover 2 Galaxy Core Galaxy Ace 2	4. ZTE ZTE V956 Grand X Quad V987 Grand Memo	7. Tanga Brand Smartphone Alcatel Archos 53 Platinum HTC Desire 500 Caterpillar Cat B15 Wiko Cink Five Wiko Darknight Lenovo A820 UMi X2 Run FI1 THL W8
3. LG Lucid 2 Optimus F7 Optimus F5 Optimus L2 II Dual Optimus L5 Best L5 II Optimus L5 Dual Best L3 II	5. Sony Xperia Miro Xperia Neo L Xperia Arc S	6. Huawei Ascend G740

SUDOKU # 6016

TELANGZUBA # 6015

	5	2		6			8			6	3	9	1	2	8	7	4	5
				8	7	3		1	2	5	2	4	9	6	7	1	8	3
3		8	1		2			9		7	8	1	4	3	5	6	2	9
			7	9	5	2				8	7	3	2	9	1	5	6	4
5		7					9			4	9	2	8	5	6	3	7	1
8		9		4	1	7	5			1	6	5	7	4	3	8	9	2
	6		4		7	8	9			3	4	6	5	7	2	9	1	8
7	8	4		3				5		2	1	7	3	8	9	4	5	6
		1		2		6				9	5	8	6	1	4	2	3	7

OJANG LUTEP # 5561

RENÜKTEMEM :

IAG :

NGESÜR :

BAALI :

MTYII :

NGNU :

ANGKODA :

SHITANIR :

NGTAJU :

GUTSMANÜ :

OJANG LUTEP TELANGZÜBA # 5560

TSÜRABURI CHIRNURTEM TIM LENMANG NUNG ANITETTSÜ ASOSHI SAYUBENTSÜ TAJUNG AGÜTSÜR

TAN HOPTA ATEMA - KOMA SÜLA ?

Q. Naga nunger yimten tebilemstsü ken o ya India-i, Naga nunger tanga teloktem yutsür, NNPGs telok den dang latet nunga koma süla ?

Olong 20 shi nung October 29, 2021 tashi nung iba telangzüba ya onok dangi (e-mail - tiryimim@gmail.com) :

(SMS - 9856121232 / 9436072422) : (WhatsApp - 7005723372 / 8729995804) : (tiryimim.in) ajanga yokang. Telangzübatemji taruba Honibarnü adoktsütsü.

MOLUNGNEN O

15 April
197514 October
2021

AOTEMJEN KIBANG JAMIR

Onoki kanga meima aliba **Aotemjen Kibang Jamir** ajungbena iba lima nungi pilar onok timtem tejashi nung aliba mapang tembar medemertem, adianutem, kidang kiyonger aser temeimertem aikati onok ki tashi arua semdangba, pa mang nüka yaritepba, asüpila sentep nung aruagi adenba aser leper tashi meinokja aküm agütsüba mapatem den ano shirnokisa shisatsü aser maparen aika nung onok dang meima yariogo, nenok ajak dang ozü kinungertemi kanga pelaba lemsateper.

Talisa, Fellowship Nursing Home nung Dr.Sungkhum aser pa den inyakertem aser Eden Medical Center ICU nung inyakertem doctor aser nurse-temi pa kanga junga anepalua yariba asoshi parnok ajak dang kanga pelaba shisemer. Ano, N Frenz, OBASSI, 16th Souls (Batch of 1987, Sainik School, Imphal) aser CASE PREMIER LEAGUE, CASE FC nung tembar medemertemi pa asüba mapang nungi pa leper nung aremba tashi akhüm tulu agüja yaritepba asoshi parnok dang kanga pelar.

Nenok shirnokisa onok nungdak maparen tapu balala nung yaritepogo, nenok temeim teyari mapatem agi onok timtem mapang anisungzük tulu nguogo. Onoki nenok nisung shia tenüngteta pelaba meshitetsü asünungji, iba molungnen o ajanga yangi nenok ajak den onok pelaba lemsateper. Tulusang Tsüngremi nenok tali moajangma ta onoki sarasademtsür.

*God called your name so softly,
That only you could hear;
And no one heard the footsteps,
Of angels drawing near,
The golden gates stood open,
God saw you needed rest;
His garden must be beautiful,
He only takes the best.*

- Temeim kinungsü Moasenla, Jabaso Manenjung, Ojala, kinunger aser anük-apangtem.

Assembly election jakdang BJP-i Goa CM melentsü: AAP

New Delhi, Mongputeni/October 23 (Agencies): Honibarnü AAP-i, sangküm Goa Assembly election agütsü lia BJP-i Goa Chief Minister, Pramod Sawant melentsü ta osang tejangja angazükogo, ta metetdaksü.

Nüburtemi Sawant leniba sorkari inyakba mapatem ajanga mepelar, ibayongji BJP-i pa melentsü, ta AAP-i metetdaksü.

New Delhi nung aliba AAP headquarters nung osangbenertem den jembiba mapang nung AAP lenir aser Delhi Deputy Chief Minister, Manish Sisodia-i, Sawant leniba

kübok BJP-i state election nung tokteptsü tasak asütsü ta meteta BJP-i chief minister tasen ka melentsü atema telemtetba agiogo, ta metetdaksü.

"Goa nüburtemi state sorkar dang mepelar, kechiyong Sawant leniba kübok sorkari lenla aika nung tamakok nguogo," ta Sisodia-i ashi.

"State nung assembly election agütsü ita ana-ase dang lia BJP-i Goa chief minister Pramod Sawant melentsü ta onoki osang tejangja angashiogo," ta metetdaksü.

AAP lenirisa, BJP-i chief minister tasen ka melenyonga

taruba Goa assembly election nung AAP-i takok tulu angutsü, ta metetdaksü.

"Lenir tasen ka melenba ajanga nüburtem mashioktsütetsü. Tang teinyakdak chief minister melenba kar shimyonga nüburtem tangatetba memelenshitsü. Taruba Assembly election nung nüburtemi Aam Aadmi Party (AAP) nem vote agütsütsü," ta pai ashi.

Sangküm küm tetenzüklen Goa assembly election agütsü, aser iba election nung AAP-i menden ajak (40) nungi tokteptsü, ta AAP-i sangdongogo.



October 23, 2021 nü Bihar kübok Darbhanga nung RJD lenir, Tejashwi Yadav-i Kusheshwar Assembly constituency by election atema nüboyim sentong ka nung shilem agiba noksa nung angur.

PM Modi-i India nung Covid vaccine yangluba company 7 ajuru

New Delhi, October 23 (Agencies): Honibarnü Ato kilonser, Narendra Modi-i India nung COVID-19 vaccine yangluba company ajak ajurua senden menogo; India nung coronavirus vaccine dose crore 100 dak tema agütsütetba alizüing atongba sülen anogo ana dang lirbo pai vaccine yangluba company tenet ajurur.

Modi leniba nung amenba senden nungji vaccine research maneni agütsü atema jembiba densema onük aika süoka o lemtepogo, ta ketdangsertemi metetdaksü.

Iba senden nungji India nung Covid vaccine yanglurtem - Serum Institute of India, Bharat Biotech, Dr Reddy's Laboratories, Zydus Cadila, Biological E, Gennova Biopharma aser Panacea Biotech nungi ketdangsertemi shilem agia aden.

Senden nungjisa Union Health Minister, Mansukh Mandaviya aser Union Minister of State for Health, Bharati Pravin Pawar nata aden.

Honibar tashi nung India nung coronavirus vaccine dose crore 101.30 dak tema agütsüogo, ta Union health ministry-i metetdaksü.

India nung tain nütsüing (arrshi küm 18 ser temapurtem) shilem 75-ibo vaccine dose kabosa

agiogo aser UTs/state 9 nungbo tain nütsüing ajaki vaccine agiogo. India nung tain nütsüing shilem crore 93 lir aser iba nungjagi shilem 31-ibo dose anaprong agiogo.

Tang tashi nung union territories aser state 9 nungbo tain nütsüing ajaki vaccine agiogo aser item states/UTs ji- Andaman & Nicobar Islands, Chandigarh, Goa, Himachal Pradesh, Jammu & Kashmir, Lakshadweep, Sikkim, Uttarakhand aser Dadra & Nagar Haveli lir.

Tang linük nung vaccine asem agütsüdar aser itemji Serum Institute of India-i yangluba Covishield, Bharat Biotech-i yangluba Covaxin aser Sputnik V vaccines lir.

Ano tanga osang ka nung, testiiba ghonda 24 tsüingda India nung ano nisung 16,326 dak coronavirus putetogo aser tang tashi nung nisung 3,41,59,56 dak iba tashidak putetogo, ta Honibarnü Health Ministry-i metetdaksü.

Tang India nung coronavirus agi teshirangdakpur 1,73,728 dang kümogo aser ibaji coronavirus caseload nungi shilem 0.51 lir.

Hokolbarnü samples 13,64,681 tendanga liasü aser tang tashi nung samples ajak senteper 59,84,31,162 tendangogo, ta ICMR-i metetdaksü.

Tensa asadangtsü atema Amit Shah-i Jammu & Kashmir semdang



October 23, 2021 nü Union Home Minister, Amit Shah Srinagar airport tonga aruba mapang nung Lieutenant Governor, Manoj Sinha-i pa agizükba noksa nung angur.

Srinagar, Mongputeni/October 23 (Agencies): Tawa Jammu & Kashmir nung kiralongrartemi civilian aika tepsetba ajanga tensa mejungi aliba mapang ka nung Union Home Minister, Amit Shah-i anogo asemnü atema J&K semdanga Honibarnü Srinagar tonga ogo.

2019 küm August 5 nü Jammu & Kashmir nung Arrla 370 agienba aser state jenjang agienba sülen union territories ana kümtsüba sülenbo tang mezüing Amit Shah-i J&K semdang.

Pai Kashmir valley nung security tensa asadangtsü aser tongti ketdangsertem aser lokti

balala den senden amentsü.

Amit Shah Srinagar airport tonga aruba mapang nung Lieutenant Governor, Manoj Sinha den tongti ketdangsertemi pa agizüka liasü.

Honibar aonung Shah-i security tensa asadanga tongti ketdangsertem den senden ka menogo aser Srinagar nungi UAE kübok Sharjah tashi international flight tenzüksüogo. Paisa Srinagar nung youth organization ka den senden amentsü.

Shah-i J&K semdangtsü jelia Kashmir tesem ajaklen security akangshia Central Reserve Police Force (CRPF) team 50 yoksema liasü.

Lahore nung TLP aser ketdangsürtem tsüngda mangatettep adok



Radical Islamist political party; Tehreek-e-Labiak Pakistan pusemertem Islamabad-i apusoa mao tsüngda Lahore yimti nung yimyim ayima senzüba noksa nung angur.

Lahore, Mongputeni/October 23 (Agencies): Radical Islamist party kati Honibarnü ashiba agi, Pakistan kübok Lahore yimti nung ketdangsürtem den mangatettep adokba sülen parnok pusemer pongu süogo. Iba mangatettep nung police ketdangsüra ana asü.

Hokolbarnü sarasadem mapang tembangba sülen Tehreek-e-Labbaik Pakistan (TLP) nungi nisung 1000 dak tema adenshi aser tepuokdak yua aliba parnok lenirtem chioxtsü khanga parnoki lenmangtem nokdanga ayu aser projectiles tem khaloktsü.

Taküm küm tetenzüklena TLP puri ayongzüka, France anema longkak aitba sentongtem agiogo aser iba ajanga embassy-i Pakistan nung aliba France nungertem dang linük toktsür aotsü tetuyuba agüja liasü.

"Police temi injang akhaba mapang Tehreek-e-Labbaik Pakistan telok nungi Hokolbar aonung nisung ana asü aser tanü nisung asem süogo," ta party-i Honibarnü tweet asü.

Iba osang dak sendakba nung Lahore nung amendaker aliba police temi kecha telangzüba magütsü, ajisüaka Hokolbar aonung police ketdangsür ana süogo, ta osang agütsü.

"Mangatettep maneni adoker lir," ta Lahore police otongdar Rana Arif-i AFP dang ashi.

"Iba ya lokti anema police tem atema defensive operation ka lir. Onoki lokti azüoktsü atema takok tashi tenokdang dang nokdangtsü merangdar," ta paisa ashi.

TLP lenir Saad Rizvi ya April ita apu. France anema longkak aiba dak sendakba nung Pakistan sorkari iba telok

ya ozüng anemba telok ka kümdaktsüba sülen pa apu.

Pa pusemertem linük yimtiba Islamaba leni aotsü amokmerenogo, kong police temi shipping container tem amshia lenmang nokdang lir.

Party-isa, parnok lenir mechiok tashi longkak aitba manentsü aser sorkar den sensak masemtsü nangzükogo.

Interior minister Sheikh Rashid Ahmad, shiba Dubai nung Pakistan T20 cricket World Cup nung asayaba repringtsü orr liasü, pa PM Khan tetuyuba nung tensa azüoktsü atema meyipa aruogo.

France tir Emmanuel Macron-i Prophet Mohammed tilutsüba cartoon tem pusemba sülen TLP-i France anema longkak ait tenzük.

April ita TLP-i longkak aitba sentong ayongzük agiba mapang Police trok tepset.

Sri Lanka-i yakbang nung inyakertertem nem Booster Shots agütsütsü



Colombo, Mongputeni/October 23 (Agencies): Sri Lanka-i Honibarnü, yakbang nung inyakertertem aser iba sülen tintet rogotem nem booster shots agütsütsü sentong yangluba sangdongogo. Linük nung Covid wara dak sendakba nung tenokdangba agütsür aliba agintsü atema renemtepba mapang tang iba sentong yangluogo.

November 1 nü nungi tenzük health, security, airport aser tourism sector tem nung inyakertertem nem

vaccine dose tasembuba agütsütsü, ta state minister of pharmaceutical production, supply and regulation Channa Jayasumana-i ashi.

Iba sülen Pfizer booster shots ya arishi küm 60 temapurtem nem agütsütsü, ta paisa ashi.

Tang tashi nung linük nung nütsünyongsük million 22 aliba nungi shilem 59 nembo vaccine agütsüogo aser health ministry-i iba jenjang ya hopta asem tsüngda shilem 70 akümtsü imlar.

Sorkari ita ka tepeyong

provinces tsüngda nung senzusenpong masütsü atema tenokdangba agütsür aliba November 1 nü salatsütsü atema lateter aliba mapang booster shots agütsütsü telemtetba agiogo. Sorkarisa, train service koba ita ana dak tema sota liasü, iba service ya taruba hopta nungi tenzüktsü, ta sangdongogo.

Sri Lanka-i, hopta trok tashi tenokdangba agütsür aliba October 1 nü salatsü aser iba sülen cinema, restaurant tem lapoktsü aser kiyimba benjung tem dena ayongzüka amungtsü asoshi temelaba agüja akhi ama inyaksangshi tenzük, kechiyong linük nung anogo shia Covid-19 tashidak menar 1000 dak tajemba liasü aser tasürtema nisung 50 tekübok liasü.

Ajisüaka lokti adenshia sentong balala agiba den public transport nung tenokdangba kar maneni agütsür liasü.

Nigeria nung taküm tepuokdak asem tashi makogo

Abuja, Mongputeni/October 23 (Agencies): Southwest Nigeria nung nisung telok kati prangbong amer tepuokdak ka amakba sülen tepuokertem aika jenaogo, ta Honibarnü ketdangsür kati ashiba Associated Press sangdong ka ajanga metetdaksü. Taküm tang agi asembenbuba linük nung tepuokdak maka tepuokertem jenshiogo. Osang agütsüba mapang tashi nung ketdangsürtemi tepuoker kwi jena ao, iba indang mejangjai liasü.

Iba tepuokdak ya Hokolbar aonung amak aser ken o bushisüngdang tembangba sülenang iba tatalokba nung teraksatsüba adokba jangjatsü.

Iba amala mesükba tatalokba ya taoba küma atalokogo aser iba ajanga aikati linük nung tepuokdak tekümzükba indang shisabulua bilemer.

"Ni tepuokdak nungi ajenertem aser tanaben pua arurtem mejangja, saka tepuokdak temeket aser jila nung security akangshiogo," ta

Oyo state kübok Oyo correctional centre otongdar Olanrewaju Anjorin-i AP dang ashi.

Tepuokdak aiben rakpoker ajenba tali akümba ajanga jena aoba tepuokertem putentsü atema police tem atema mapa tasak kümogo. Lagos nung amenoker aliba online newspaper TheCable-i July ita sangdong ka ajanga, 2017 küm nungi tang tashi nung tepuoker 4,307 jenaogo ta metetdaksü.

2021 küm kija tepuokdak ana amakba sülen tepuoker 2000 dak tema jenaogo. September 13 nü north-central Kogi state nung tepuokdak ka amakba sülen tepuoker 240 jena ao aser April pongu nüa southeast Imo state kübok tepuokdak ka nungi tepuoker 1,800 shi jena ao.

Ajisüaka linük nung tepuokdak amakba ya sendaktepa mali ama saka tepuokdak ajak ya explosives amshia amak, ta AP sangdong ajangsa metetdaksü. Ketdangsürtemi tepuoker kar puogo aser kar parnok mulungka nung meyipa aruogo.



US military-i Syria nung Hokolbarnü drone amshia amakba mapang al-Qaeda lenir tejen Abdul Hamid al-Matar tepsetogo, ta US Central Command otongdar kati ashi.

Singapore-i senzusenpongertem nem temelaba agütsür

Singapore, Mongputeni/October 23 (Agencies): Singapore-i Honibarnü, India, Nepal aser Bangladesh densema South Asian linüktem nungi senzusenpongertem nem tenokdangba agütsür aliba agintsü asoshi telemtetba agiba sangdongogo. Linük health ministry sangdong ka ajanga ashiba agi, October 26 nü nungi tenzük anogo 14 tsüngda India, Bangladesh, Myanmar, Nepal, Pakistan aser Sri Lanka süier alirtem linüki aitdaksütsü mesera süia odaktsütsü, ta ANI sangdong ka ajanga metetdaksü.

Taoba mapang item linüktem nungi senzusenpongertem Singapore-i maitdaksüi liasü. Linük nung Covid-19 tensa asadangshiba sülen tang iba telemtetba agiogo.

Singapore nung tawa anogoshia nisung 3000 tema dak Covid-19 tashidak poteta arudar

asir Hokolbarnüa nisung 3637 dak tashidak potetogo.

Bodhbarnü expanded quarantine-free programme ka kübok Singapore-i mezüngbuba senzusenponger agizükogo. Iba hopta nungi tenzük vaccinated travel lanes (VTL) ya Canada, Denmark, France, Italy, the Netherlands, Spain, Britain aser United States nungi arurtem atemaa atsülangtsüogo. Item linük tem nungi arurtemi Covid-19 tashidak tendangba ajangetetra parnok quarantine medeni Singapore-i aittetsü.

Kasa mapang nung Singapore-i, linük 15 dak tema nungi vaccine ajunga agir aliba senzusenpongertem quarantine mesüdaktsüi aitdaksütsü atema sentong yangludar. Linüktem rongnung Indonesia, Malaysia, Vietnam aser United Arab Emirates densema lir, ta Bloomberg sangdong ka ajanga metetdaksü.

YOUTH OASIS CENTRE

Christian kiyimba benjong agitsü sadema lapoka lir, nungdakba purtemi agüja aliba number nung tongteprateptsü metetdaksür.



For Booking: 7005773879 / 9862675728 / 9862918359

Sentilong Ozukum indang "The Case of Longti Village" kaket sayaogo



Mokokchung, Mongputeni/October 23, 2021: Honibarnü, Urban Hub Café nung "The Case of Longti village" kaket sayaba mapang, iba kaket zülur Sentilong Ozukum den 'Dreams and Chaos' web series indang Director aser cast & crew tem külemi tangokba noksa ka yangi angur.

Mokokchung, Mongputeni/ October 23, 2021 (TYO): Honibarnü, Urban Hub Café, Mokokchung nung, Sentilong Ozukum indang kaket pezübuba - "The case of Longti village" sayaogo. Sentilong-i züluba kaket ya Hill Theatre, Director aser Film yanglur Bendang Walling-i saya liasü, ta sangdong ajanga metetdaksü.

Iba kaket sayaba sentong nung, Bendang Walling-i, tawa tanü lokti nung tim masüba mapatem (social evils) inyakba jangjatetsü atema iba kaket yagi jembir, ta ashi. Tarutsü nung, iba kaket nung ajemdaker movie ka yangluner, ta pai lemsateper.

Ronojyoti Roy-i iba kaket indang telok dang metetdakja liasü.

Iba kaket takok ngua

zülutetsü aser sayatsü asoshi ajaki nungitta yariba atema kaket zülur, Sentilong Ozukum-i pelaba metetdaksü. Pai ashiba agi, tawa tanü state tensa aser iba tesem nung timtem balala adokbatem ngua/asadangteta iba kaket zülutsü ajungmesoa liasü.

"The Case of Longti village" ya 'thriller' aser 'mystery' novel ka asütsü, koba Bookipedia Publications, Mokokchung ajanga adoktsü. Bookipedia Publications ajanga iba kaket mezüng adoker asütsü. Bookipedia Publications ya 'Bookipedia foundation' ajanga achaayangba mapatong ka lir, kong State aser tanga tesem nung writer tasentemi parnok mapa/sempet sayutsü asoshi sabang ka agütsütsü aser; 'sempet' (talent) aser maongka

tsüngda tesendaktep yanglutsütsü nükjidong yur inyaker.

2020 küm Bookipedia Publications ya publishing house ka ama Ministry of Human Resource Development, Govt of India den register süa liasü.

"The Case Of Longti Village" ya Bookipedia Publications indang mezüng kaket asütsü.

Kaket azüngertem ajungmesotsü atema, iba Foundation kübok, 2019 küm Bookipedia Library ka lapoktsüogo. Bookipedia Library aser Bookipedia Publications dak alaka, iba foundation-i lokti nung sensaker/senotsü peria maliba kibongtem nungi kaketshirtem shisaliok bushiba tsütsü nungitta yaridar.

The Case Of Longti Village kaket nungi ajangzükba ajak shisaliok bushiba tsütsü kaketshir timba nungitta yaritsü asoshi amshitsü, ta Sentilong-i metetdaksü.

Taoba mapang Sentilong Ozukum-isa kaket balala zülüogo. Pai züluba kaket rongnung Campus Blues (2010), Sincerely Yours (2017) aser Dreams and Chaos (2020) dena lir. The Case Of Longti Village kaket ya teshimtet store tem nung angutsü. Kasa mapang, online sabang - Ilando nunga iba kaket angutsü, ta kasa sangdong nung shia lir.



OFFICE OF THE
ALIBA BAPTIST AROGO
P.O. Mokokchung – 798601 B.P.O - Sabangya

TEPELA LEMSATEPER

Aliba Baptist Arogo ajanga iba osang azünger ajak dangi tepela osang lemsateper.

1. Tantsü Tambo Mission, Dimapur Aliba Fellowship ajanga parnok anibelem mesasai taküm agi 11 ben tashi yimdam alir arishir küm 80 tema alir ajak nem tanela renemshia alitsü tayongzük o den medical camp ayongzükba jenjang tulu aketba sempet agütsüogo. Talisa Dr. & Mrs. Imcha kibongi nubu aser mozü teperi angati agütsü aser Mr. & Mrs. Longrikaba Pongen kibongi sempet tajung agütsüba aser shirnoki iba mapa nung nebu aser mapang agüja tenlaogo ajak dang pelar.

2. Mr. & Mrs. Tamsü Jamir, Ophthalmic Asst. CHC. Tseminyu, kibongi nisung 105 tenük repranga mozü den tenük aina angati agütsüba asoshi pelar.

Kija aser kibong shirnoki mapa tajung inyakba ajanga arishirtem aser timtema alirtem asoshi teyari tulu agütsüogo, Tsüngremi nenok taküm aser kibong tali moajangma ta Aliba Arogo sarasadem.

Sd/-
Pastor, ABA

Sd/-
Secretary, ABA

PELABA LEMSATEPER

Aso: 21.11.1947 - Asü: 20.10.2021

Onoki teti meima aliba asür Longritemjen (Changtongya), pa mapang tatsüka shiranga alidang aser anojungi 20.10.2021 anogo ajungbena iba akümüli nungi pila orr onok mangyim jashi nung alidang kija, medemertem, temeimertem, Arogo balala, telok-tentet aser union kwinakati shisatsü, tanela, nübu aser rongsen agi nungitta yariogo, nenok ajak dang ozüi pelaba lemsateper.



Nenoki ozü dang aria bilema, temeim sayuba den sarasadem aser lenla balala ajanga nungita yariba agi onoki tashi tasen angu aser item temeim mapa sayuba ajanga onok mulung süneptsüogo.

Nenok kija shia tenüng teta ozüi pelar ta meshitetba atema sasar, ajisüaika Tulusang Tsüngremi nenok ajak molamushia moajangma ta ozüi sarasademtsür. Temulung taroktiba nungi ozüi nenok dang pelaba shisemer.

-Temeim, Kinungtsü, Chirnurtem, Semchirtem, Anük-Apangtem aser Kinungertem.

(Lanlia, tajung aser temulung lemtetba kilir; na ne kibur tepela daki iang. Mathi 25:21)

Menungra Bilemteter



Asür T. Mapumongba (Mongsenyimti)

Tasüba Anogo : 24th October 2020

Onoki teti meima aliba Oba, Na iba akümüli toktsür tanü küm ka abensar.

Na akümüli nung alidang, ajak den kasa litetba aser nü menerem jakden bilemteter, tanü onoki menungra sarasadema amonger.

- **Nai toktsür aoba Kinungtsü, Chirnurtem aser Semchirtem.**

Security Forces-i teyari agütsü



Dimapur, Mongputeni/October 23, 2021 (TYO): Honibarnü, IGAR (North) kübok Assam Rifles indang Jalukie Battalion den Mainamatshi yimtsüng nungi lanurtem longjemer Jalukie, Peren District nung lenmang raksar aliba yanglushia liasü, ta sangdong ajanga metetdaksü.

Nübur/lisopur tem aser security forces tsüngda tesendaktep tali akangshidaksütsü nükjidong yur, Assam Rifles-i lanurtem den longjemer Jalukie

nung lenmang tem yanglushia liasü. Tzünglu kanga sashia aruba ajanga, Jalukie lenmang kanga mejungi raksar liasü.

Nübu medema inyakba den, Security forces-i JCB amshia lenmang tezülen tzü aolen (nullah) merüktetsü aser lenmang yanglushitsüogo.

Lisopurtem timtem ajiteta teyari agütsüba atema, Mainamatshi yimtsüng nung tekolakpur aser yimertemi Assam Rifles dang pelaba metetdaksü.

WTA Finals nung Ashleigh Barty masayatsü



Ashleigh Barty

Mongputeni/October 23, 2021 (Agencies): Honibarnü, World no. 1 aser Wimbledon champion Ashleigh Barty-i temang anepalutsü aser sangküm asayamung atema renemshitsü tebilemba nung, lai taküm season tatembuba asayamung WTA Finals nung shilem magitsü lemtet.

September ita US Open tasembuba round nung tsükadokba sülen, Australia tsür Barty-i asayamung ka nung danga asayadanga mali aser 2019 küm French Open takok anguba sülen, Wimbledon nung tanaben title akokba densema taküm lai title pungo tashi takok nguogo.

"Mexico nung WTA Finals densema taküm (2021) tanüingba season asayamung ka

nungdanga shilem magitsü osang sangdonger," ta arishi küm 25 tain Barty-i ashi.

"Iba telemteba agitsü tasak liasü saka 2021 season nung mazüingi asaya arur temang anepalutsü asoshi mapang peria agütsüsüla aser sangküm asayamung atema renemshia atatsü nüngdaker," ta lai ashi.

Alima ajunga asüngba coronavirus wara ajanga taoba küm iba asayamung thitsütsü telemteba magidang, 2019 küm Barty-i WTA Finals takok angu.

Tanaben Australia aotsü asoshi quarantine temzüng takang aliba ajanga taküm, Barty-i bendanglen timbaka munga liasü. September nungang la Australia-i shilang aser ozüing agi melaba ama hotel isolation nung hopta ana tashi

amungtsü. Barty-i ashiba agi, iba amatenas/tia tanaben majuruner. Ibayongji, taruba ita Guadalajara nung asayatsü aliba WTA Finals nung shilem magitsü lemtet.

"Tang ama mapang ka nung Queensland-i tanaben oa aser quarantine temzüng nung anidaksü tayongzükba asadanger sülen, sangküm January atema renemba sentong nung timtem madokdaksütsü asoshi ni iba telemteba agir," ta lai ashi.

"WTA Finals nung WTA team aser asayar ajaki tajungtiba nung shilem agitsü asoshi imlaa atar," ta Barty-i lemsatet.

Taküm Covid-19 ajanga Australian Open menor asaya liasü aser sangküm Barty-i iba asayamung nung shilem agitsü tebilemba lir. January 2022 nung Melbourne Park kübok Australian Open ayongzüksü.

Grand Slam season tasenba atema taruba hopta tem nung WTA asayamung ayongzüksü terenemba lir. Ajisüaka, Covid-19 dak sendakba nung, Australia nung item asayamung ayongzüksü asoshi ano telemteba magii lir.

Melesai Dawhuo-i 1buba Rapid Nagaland State Chess C'ship kokogo



1st Rapid Nagaland State Chess Championship nung takoker aser ketdangsertem külemi tangokba noksa nung angur.

Kohima, Mongputeni/October 23, 2021 (TYO): Honibarnü, Lower Chandmari nung Nagaland Chess Association (NCA) ajanga ayongba 1st Rapid Nagaland State Chess Championship nung Melesai Dawhuo-i takok nguogo, ta sangdong ajanga metetdaksü.

Kasa tetoktepba nung, Salhuto Nyekha aser Khrielie Sano nati tanabuba aser tasembuba jenjang nung takok angur. Mezüingbuba jenjang nung takok angur Melesai nem senpet 25,000 den trophy aser citation agüja liasü. Iba asaya nung runners-up aser tasembuba jenjang nung takok angur nem senpet 20,000 aser senpet 10000 den trophy aser citation agütsüogo.

Ano, Open category nung 'top ten' asayatem nem senpet den külemi Certificate agüja liasü.

Teküboklen agüja alir tenüngtem ya tanga category balala nung takok angurtem asütsü:

*** Under - 18 Years Category**
1. Asile R Hau (St. John's School Kohima)

2. Heudigwangbe Meru (Livingstone Foundation International Dimapur)
3. Muzivolu Veswu (Westside School Dimapur)
4. Intovi K Awomi (Holy Family Hr. Secy School Kohima)
5. Kaboto K Awomi (Holy Family Hr. Sec School Kohima)

*** Under - 14 Years Category**

1. Pulonito Hesso (Coraggio School)
2. Setsuzo Phesa-o (Chandmari Higher Sc. School Kohima)
3. Jitihto Nyekha (Westside School Dimapur)
4. Cidibe Peter Mbung (Sainik School Punglwa Peren)
5. Suipoi R Hau (St. John's School Kohima)

Maneni, 1buba Rapid Nagaland State Chess C'ship shibangba sentong nung, taoba mapang NCA President aser Rtd. Director, Agriculture Department, Nagaland-i takok angurtem nem sempet agüja liasü, ta kasa sangdong ajanga metetdaksü.

Mhakenyi Kro-u FC aser Morning FA nati kokogo 21BUBA NSF MARTYRS MEMORIAL TROPHY:

Kohima, Mongputeni/October 23, 2021 (TYO): IG Stadium, Kohima kübok tang asaya aliba NSF Martyrs Memorial Trohpy football asayamung nung Mhakenyi Kro-u Football Club aser Morning Football Association nati pei tata asaya takok nguogo.

Honibarnü, iba asayamung mezüing match nung Mhakenyi Kro-u FC aser Capital College of Higher Education na asaya liasü, kong Mhakenyi-i goal 11-

0 Capital College tsükdaksü. Iba asaya nung, Zawlthanglien-i Mhakenyi Kro-u FC atema mezüing goal inoktsü aser Yhunshalo-i 'double hat-trick' idaksü. Ano, Mhakenyi atema Vekruto, Lalminlun aser Nguaslie nungeri goal ka ka idakja liasü.

Maneni, kasa asayamung tanabuba match nung, Morning Football Association (MFA) aser 12 United Tribe FC tsüingda asaya liasü. Team anapronglai goal 2-2 idakja

asaya tembangba sülen, tie-breaker ajanga MFA-i goal 4-1 agi United Tribe FC tsükdaksü.

MFA atema Seyiekhrietuo Suohu-i minute 35 aser 65buba nung goal ana idaksü; aser United Tribe atema Nahngon Konyak-i goal ana inokja liasü.

***Hombor (25.10.2021) atema asaya yamai alitsü:**
1. Fifa FC vs Tangkhul Katamnao Saklong @ 12:30 pm.
2. ANTA vs Rikhu Warriors @ 2:00 pm.

51buba Chakhroma Sports Meet tenzükogo



Dimapur, Mongputeni/October 23, 2021 (TYO): Honibarnü, Medziphema Local Ground nung, Chakhroma Youth Organization (CYO) ajanga ayongba 51buba Chakhroma Sports Meet asayamung tenzükogo. Iba asayamung lapokba sentong nung Medo Yhokha, Advisor to Chief Minister & Advisor Technical Education & Election, Govt of Nagaland tongti tesemdang liasü, ta sangdong ajanga metetdaksü.

Iba asayamung ya October 23, 2021 tashi agitsü aser Angami-Chakhroma Range nungi yimtsüing 28 agi iba asayamung nung shilem agidar, kong team temi saispong ana -

Football (men) aser Volleyball (men & women) nung tokteptsü.

Medo Yhokha-i iba asayamung nung shilem agirtem dang saispong wadang nung tajungtiba inyaksü asoshi ajungmesoba mapang, tawa tanü state nung government sector nung mapa inyaker tali akümba aser tang Nagaland nung sorkar tenzükba wadang nung inyaker timba küma aoba indang metetdaksü. Iba dak sendakba nung, pei sasa bilemdanga/shisadanga inyaksü nüngdaker aser sempet alirtemjangatetsüla aser mapa nung anioksü asoshi asalentong tajung amshia tenzükba wadang nung parnok nem maongka agütsüsüla. Item

ajaki asadanga CSOs-i maongka agütsüsü atema inyakdar, ta pai ashi.

Sorkar mapatong aser sentong tem nung lanur nem teyari balala agütsüsü akok aser item mapatong inyaksü asoshi asen lokti nung lennirtemi khuret abener, ta pai metetdaksü.

Pai, Chief Minister Shri. Neiphiu Rio lenisüba nung temulung lemteter ta ashi. Rio lenisüba kübok asalentong aser sentong balala yangluogo, ta pai ashi aser Sorkar maparen tashiita aotsü asoshi nübur dang longjemer inyaksü ajungshiogo.

Lokti balala den tesendaktep tajung yangluba aser tentet tajung ka ama inyakba atema, Medo-i

CYO dang pelaba metetdaksü. Terenlok alitsü aser lokti tejakleni aotsü asoshi ajak ka küma longjemer, timtem arema aser meranga inyaksüla, ta pai ayongzükba liasü.

Kasa sentong nung, ASA President Lhoubeizo Kesiyie-i salem lemsatet aser iba asayamung takok ngua asayatsü asoshi shilem agirtem ajungshiogo. Iba asayamung meraketa ayongba atema, Vichiituolie Mere, President, CPO-i CYO dang pelaba metetdaksü.

Iba sports meet ajanga asayaba kisüing masü nübur tsüingda yimji-yimjung adokdaksütsü aser tesendaktep tali akangshidaksütsü imlar, ta pai lemsatet.

51buba Chakhroma Sports Meet lapokba sentong nung,

Neizelie Keditsu menden liasü. Rev. Zhabu Terhiizha-i Tsüingremer temoatsü meshizüka sarasademtsü aser Akhriezo Solo-i ken ka tena telok saksalemdaksü. Iba sülen, Atubu Kuotsu, Secy, Games&Sports, CYO-i team tem tenangzüktep agiba achayanga liasü.

Maneni, iba meet mezüing football match nung, Tsiepama Youth Organization-i Medziphema Village youth organization madak goal 1-0 agi takok angur. Tsiepama Youth Organization atema Keneizeto (15)-i goal ka idaksü. Ano Exhibition Match tanga ka nung Youth Organization Ranges United aser ASA/AYO Team tsüingda asaya liasü, kong ASA/AYO team-i goal 4-3 agi iba asaya takok angur, ta kasa sangdong nung shia lir.

BILEMDANGANG

"Zübazüba anguba rongsenji koma aru yamaji oadoker."